

**Tarnimikkut nappaatilinnut immikkoortorta qarfimmi nammineersinnaajunnaarsitsinermi
allaanerumik pinngitsaaliissummik iliuuseqarneq pillugu Namminersorlutik Oqartussat
nalunaarutaat nr. 20, 2. december 2013-imeersaq**

Tarnimikkut nappaatilinnik sullissinermi nammineersinnaajunnaarsitsineq, allatigullu
pinngitsaaliineq pillugit Inatsisartut Inatsisaanni nr. 24-mi, 3. december 2012-imeersumi § 12,
imm. 7, § 13, imm. 3, § 18, § 28-lu naapertorlugit aalajangersarneqarput:

Kapitali 1

*Pinngitsaaliissummik katsorsaaneq
Piumasaqaatit nalinginnaasut*

§ 1. Tarnimikkut nappaatilinnik nammineersinnaajunnaarsitsineq allatigullu pinngitsaaliineq
pillugit Inatsisartut Inatsisaanni § 9 malillugu taamaallaat inuit Dronning Ingridip
Napparsimmavissuani uninngasut pinngitsaaliissummillu nammineersinnaajunnaarsinneqartut
pinngitsaaliissummik uninngatinneqarnissamut piumasaqaatit tunngavigalugit pinngitsaaliissummik
katsorsarneqarsinnaapput.

Imm. 2. Pinngitsaaliissummik katsorsaaneq Dronning Ingridip Napparsimmavissuani
tarnimikkut nappaatilinnut immikkoortorta qarfimmi nakorsaanermi aalajangiivigineqassaaq.

Imm. 3. Katsorsaariaasissaq imarisaalu, Inatsisartut Inatsisaanni § 4-mi aalajangersagaq
naapertorlugu annikinnerpaamik iliuuseqartoqarsinnaanerup salliunneqarnissaanik tunngaveqarluni
aalajangiivigineqassapput.

Pinngitsaaliissummik nakorsaatitortitsineq taamaaqataalu.

§ 2. Katsorsaariaatsit allat atorsinnaangitsutut nalilerneqarpata aatsaat pinngitsaaliissummik
nakorsaatitortitsisoqarsinnaavoq.

§ 3. Nakorsaatitunnginnerup kingunerisaanik napparsimasup inuunerata peqqissusaataluunniit
navianartorsiortinneqarnerat eqqaassanngikkaanni, nakorsaatitornissap pisariaqassusaanik
napparsimasup nassuiaattuaraluarnera sunniuteqanngippat, pinngitsaaliissummik
nakorsaatitortitsisoqarsinnaavoq.

Imm. 2. § 1, imm. 2, naapertorlugu nakorsaanerup aalajangiinissaa sioqqullugu, napparsimasoq
naammaginartumik piffissalerlugu nakorsaatitortinneqarnissamut akuersisinnaanissamut
eqqarsarfissinneqassaaq. Sivisunerpaamilli ullut pingasut napparsimasoq eqqarsarfissinneqassaaq.

Imm. 3. Nakorsaanerup eqqarsarfissinneqarnerup sivisussusissaanik naliliinermi, imm. 2
naapertorlugu ilaatigut nappaatip navianaateqarnera sivisussusaalu, napparsimasup
nakorsaatitortitaanissamut imminnut assortuuttunik isumaqarnera, nakorsaatitunnginnerullu
allatigut pinngitsaaliinikkut iliuuseqartoqartariaqalerneranik kinguneqarsinnaanera napparsimasullu
qanoq naalliuuteqartiginera il.il. pingaartissavai.

Imm. 4. Nakorsaanerup pinngitsaaliissummik nakorsaatitortitaanissaq pillugu
aalajangiinnginnerani, napparsimasoq apeqqut taanna pillugu siunnersortiminik
oqaloqateqarnissamut periarfissinneqarsimassaaq.

Imm. 5. Eqqarsarfissinneqarnermi napparsimasoq ullut tamakkiallugit nammineq piumassutsi
naapertorlugu nakorsaatitornissaanik neqeroorfigineqassaaq, kajumissaariniarnerlu allattugaatinut
nalunaarneqassalluni.

Imm. 6. Navianaatillit imm. 1-imi taaneqartut eqqaassanngikkaanni, pinngitsaaliissummik
nakorsaatitortitsinermi napparsimasup siunnersortaatalu nakorsaatitortitsinermi siunertaanik,

sunniutaanik kingunerluutigisinnaasaanillu tamakkiisumik paasitinneqarsimanissaat piumasagaataavoq.

§ 4. Pinngitsaaliisummik nakorsaatitortitsinermi nakorsaatit misilerarneqareersut nalinginnaasumik annertussusilikkat kingunerluutikinnerpaallu atorneqassapput.

Imm. 2. Kingunerluutaasinnaasut nakkutigeqqissaarneqassapput paasineqarniaripatalu sapinngisamik ajunginnerpaaq anguniarlugu akiorniarneqassallutik. Tamatumunnga atatillugu pinngitsaaliisummik nakorsaatitortitaanerup taama annertutigiinnarnissaa eqqarsaatigeqqissaartariaqarpoq.

Imm. 3. Annertuallaamik nakorsaasiisoqassanngilaq.

§ 5. Nakorsaatit sivisuumik sunniusimasartut sapinngisamik atornaveersarneqassapput , nakorsaatillu napparsimasumut qanoq sunnuteqarnerannik ilisimasagarfiunngitsuni napparsimasunik pinngitsaaliisummik nakorsaaseeqqaarnissami atorneqassanatik.

§ 6. Pinngitsaaliisummik nakorsaasiinerni tamatigut nakorsamik peqataasoqartassaaq.

§ 7. § 1, imm. 1-imi piumasagaatit eqquutsinneqarpata, napparsimasullu inuunera taamaanneqarnissaanut taamaasiornissaq pisariaqarpat imaluunniit taamaasiunnginneq napparsimasup inuuneranut peqqissusaanulluunniit annertuumik navianartorsiortitsissappat, aatsaat pinngitsaaliisummik nerisitsisoqarsinnaavoq.

§ 8. § 1, imm. 1-imi piumasagaatit napparsimasumit eqquutsinneqarpata, napparsimasup inuunera navianartorsiorpat imal. navianartorsiulersinnaappat aatsaat, qupinnguallatitsinikkut pinngitsaaliisummik katsorsaasoqarsinnaavoq.

Timikkut nappaammut pinngitsaaliisummik nakorsarneqarneq

§ 9. Inatsisartut Inatsisaanni § 5 naapertorlugu nammineersinnaajunnaarsitaasinnaanermut piumasagaatinik eqquutsitsisoq timikkullu nappaammut nakorsartinnissamut paasissutissinneqareernikkut akuersissuteqanngitsoq, nappaatip pineqartup inuunera peqqissusaaluunniit annertuumik navianartorsiortippagu pinngitsaaliisummik nakorsarneqarsinnaavoq.

Imm. 2. Napparsimasoq Dronning Ingridip Napparsimmavissuani tarnimikkut nappaatilinnut immikkoortortaqarfinnut unitsitaasimangippat, pinngitsaaliisummik nakorsarneqarnissaq sioqqullugu pinngitsaaliisummik unitsinneqarnissamut uppersaasiortoqarnissaa, tarnimikkullu nappaatilinnut immikkoortortami qulaani pineqartumi nakorsaanerup pinngitsaaliisummik unitsinneqarsinnaanermit piumasagaatit eqquutsinneqarnerisa aalajangiivigereersimanissaat piumasagaataavortaaq.

Imm. 3. Imm. 1-imi taaneqartut pinngitsaaliisummik timikkut nakorsartinnissamut, nakorsaaneq tarnikkut nappaatinut immikkut ilisimasalik pineqartoq timikkullu nappaatinut immikkoortortami pineqartumi nakorsaaneq aalajangiisuussapput.

§ 10. Timikkut nappaatilinnut immikkoortortamiinnermi pinngitsaaliisummik iliuseqartoqartariaqalerpat, nammineersinnaajunnaarsitsineq allatigullu pinngitsaaliineq pillugit Inatsisartut inatsisaat naapertorlugu, nakorsaanerup tarnikkut nappaatinut immikkut ilisimasallip nakorsaanerullu timikkut nappaatinut pineqartunut immikkoortortameersup aalajangiinerat tunngavigalugu aatsaat taama pisoqarsinaavoq.

Imm. 2. Imm. 1 naapertorlugu pinngitsaaliissummik iliuuseqarneq, tarnimikkut nappaatilinnut immikkoortortaarfimmi peqqissaanermik suliallit timikkullu nappaatinut pineqartunut immikkoortortaarfimmi peqqissaanermik suliallit isumagissavaat.

§ 11. Napparsimasup qanoq innera timikkullu nakorsarneqarnera apeqqutaatillugu, nakorsaanerup tarnikkut nappaatinut immikkut ilisimasallip timikkullu nappaatinut pineqartunut immikkoortortami nakorsaanerup isumaqatigiinnerisigut, napparsimasoq tarnimikkut nappaatilinnut immikkoortortaarfimmut nuutinneqasaaq.

Maalaaruteqarneq

§ 12. Napparsimasup inuuneranut peqqissusaanullu annertuumik navianartorsiortitsinera pissutigalugu, imaluunniit napparsimasoq allanik timikkut peqqissutsikkullu annertuumik navialisitseqqunagu ingerlaannaq iliuuseqarnissaq pisariaqanngippat, pinngitsaaliissummik iliuuseqarnissamik aalajangiineq pillugu maalaaruteqarneq kinguartitsinermik kinguneqartarpoq.

Kapitali 2

Napparsimmavimmiit angerlareernermi pinngitsaaliissummik malittarineqarneq

§ 13. Inatsisartut inatsisaanni § 17-imi piumasaqaatit eqquutsinneqarpata aatsaat napparsimmavimmiit angerlareernermi malittarinnittoqarsinnaavoq.

Imm. 2. Napparsimmavimmiit angerlareernermi pinngitsaaliissummik malittarineqarnissaq pillugu nakorsaanerup aalajangiinerani nakorsartinnissaq siunertaralugu peqqinnissaqarfimmut, tassunga ilanngullugu najukkami tarnimikkut nappaatilinnik sullissivimmut, ornigunnissamik taamaallaat imaqasaaq.

Imm. 3. Unitsitsineq pineqartoq sioqqullugu tassungalu atatillugu napparsimasup angerlareernermini pisariaqartumik nakorsarneqarnermik taamaatitsinissaanut ilimaginninnermut pissutsit suut tunngavilersuutaanersut, nakorsartinnerullu taamaatinneqarnera napparsimasup peqqissusaanut qanoq kinguneqassanersoq, napparsimasut pillugit allattugaatinut nalunaarsorneqassapput.

Imm. 4. Inatsisartut inatsisaanni § 14 imal. § 15 naapertorlugu, napparsimmavimmiit angerlartinneqarnermut atatillugu pinngitsaaliissummik malittarineqarnissami, angerlalerneermut atatillugu isumaqatigiissusiornissaq, imaluunniit ataqatigiissaarinnermut pilersaarusiornissaq nakorsaanerup akisussaaffigai.

Imm. 5. Peqqinnissaqarfiup immikkoortuisa ilaannut napparsimasoq unitsinneqarluni pinngitsaaliissummik nakorsaatitortinneqartariaqarpat, qanoq annertutigisumik pinngitsaaliinikkut nakorsaasoqarsinnaanera katsorsarneqarnissamut pilersaarummi allassimassaaq.

§ 14. Napparsimmavimmiit angerlareernermi pinngitsaaliissummik malittarineqarnermut atatillugu pinngitsaaliissummik nakorsaatitortitsineq Inatsisartut inatsisaanni § 4-mi maleruagassat naapertorlugit ingerlanneqasaaq.

Imm. 2. Nakorsaatit atorneqartut, tassunga ilanngullugit sivisuumik sunniusimasartuusinnaasut, sunniutaat ilisimaneqartumik napparsimasumut iluaqutaassapput.

Imm. 3. Napparsimmavimmiit angerlareernermi pinngitsaaliissummik malittarineqarnermi nakorsarneqarnerup, napparsimasup peqqissusaanut pitsaasumik sunniuteqarnerata annertuallaanillu kingunerluuteqannginnerata qulakkeernissaa Dronning Ingridip Napparsimmavissuani tarnimikkut nappaatilinnut immikkoortortaarfimmi nakorsaanerup akisussaaffigaa.

§ 15. Napparsimasoq nakorsaatitornissaq siunertaralugu aggerfissatut isumaqatigiissutaasut naapertorlugit takkutinnigippat, Dronning Ingridip Napparsimmavissuani tarnimikkut nappaatilinnut immikkoortorta qarfimmi nakorsaanerup politiit ikiorsiullugit napparsimasup peqqinnissaqarfiup immikkoortuanut pineqartumut pinngitsaaliissummik nakorsartikkiartortinissaa aalajangiivigisinnaavaa.

Imm. 2. Politiinut attaveqartinnani napparsimasumut naammagintumik attaveqarniartoqarsimanera qulakkeerneqassaaq.

Imm. 3. Sapinngisaq tamaat piaartumik politiit ikiorseqarnissamik qinnuteqartoqassaaq, napparsimasorlu aaneqartussaq pillugu sukumiisunik paasissutissiisoqassalluni.

Imm. 4. Napparsimasumik aallerneq angallassinertu Inatsisartut inatsisaanni § 4, imm. 3, naapertorlugu pisariaqanngitsumik kannqutsatsitsisoqarqunagu ajoqutitaqarqunaguluunniit, sapinngisaq tamaat qajassuartumik malunnaarsartumillu ingerlanneqassaaq. Politiit peqataasut sapinngisaq naapertorlugu inuinnartut atisaqassapput. Napparsimasoq politiit biiliinut ilaatinneqassapat sapinngisaq tamaat inuinnat biili suliffimmi atorveqartartut atorlugit ingerlanneqassaaq.

Imm. 5. Inatsisartut Inatsisaanni § 17, imm. 3, oqaaseqatigiit aappaat, naapertorlugu peqqinnissakkut sullissisoq politiit aallerneranni sapinngisamik peqataasussaq, ajornanngippat napparsimasumit ilisarimanneqassaaq, napparsimasorlu nakorsartissimanera ilanngullugu, ilisimasaqarfigissallugu.

Imm. 6. Napparsimasup aaneqarnermut pinngitsaaliissummillu nakorsaatitortitaanermut akiunnera, napparsimasup nakorsartinneranut periarfissaanullu kinguneqartinneqartariaqanngilaq, tarnikkut nappaatilinnik sullissinermi pinngitsaaliissummik iliuuseqarnermi allanisulli napparsimasup aaneqarnermut pinngitsaaliissummillu nakorsarneqarnermut qisuariaataanut immikkut paasinnittoqartariaqarpoq.

§ 16. Dronning Ingridip Napparsimmavissuani tarnimikkut nappaatilinnut immikkoortorta qarfimmi nakorsaanerup napparsimmavimmit angerlareernermi pinngitsaaliissummik malittarinninnerup Inatsisartut Inatsisaanni § 17, imm. 6, naapertorlugu qaammatit pingasut pallillugit sivitsornissaa aalajangiuppagu, napparsimasoq siuningaaniit kingusinnerpaamillu maannamut malittarinninnerup naammassinissaa sap. ak. ataatsimik sioqqullugu ilisimatinneqassaaq.

Imm. 2. Maannamut malittarineqarnermut atatillugu kingusinnerpaamik nakorsaatitortitaanissamut kingullermut ornigunneranut atatillugu, nakorsaanerup napparsimasoq oqaatsitigut allakkatigullu sivitsuinissaq pillugu ilisimatissavaa.

§ 17. Napparsimmavimmiit angerlareernerup kingorna pinngitsaaliissummik malittarineqarnissap maalaarutigineqarnera, aalajangiinissap tungaanut kinguartitsinermik kinguneqassaaq.

Imm. 2. Inatsimmi § 17, imm. 3, aamma imm. 6, naapertorlugit politiit aaneqarnissap napparsimmavimmiillu angerlareernermi pinngitsaaliissummik malittarineqarnissap sivitsornissaanik nakorsaanerup aalajangiinera pillugu maalaarutit aalajangiinissap tungaanut kinguartitsinermik kinguneqarneq ajorput.

Kapitali 3

Pinngitsaaliissummik aalaakkiineq nukersorfiginninnerlu

Pinngitsaaliissummik aalaakkiineq

§ 18. Inatsisartut Inatsisaanni § 19, imm. 2, naapertorlugu pinngitsaaliissummik aalaakkiisoqarsinnaavoq.

Imm. 2. Aalaakkiinermi taamaallaat qitequtit, paffinnut aamma/imaluunniit singernernut aalaakkiissutit aqqatillu atorneqarsinnaapput.

Imm. 3. Pinngitsaaliissummik aalaakkiinialersinnani, nakorsap napparsimasumik misissucrererani tamatumunnga inassuteqaataa pissarsiarineqarsimasariaqarpoq.

Imm. 4. Nakorsap inassuteqaataanut napparsimasup massakut qanoq innera tunngavigalugu pinngitsaaliissummik aalaakkiinissap pisariaqassusaanik nakorsap naliliinera allatullu iliuuseqarsinnaanerup, soorlu nakkutilliinerulernerup naammannginnerata imaluunniit naammassineqarsinnaannginnerata paasineqarsimanera piumasaqaataavoq.

Imm. 5. Qitequtip saniatigut paffinnut aamma/imaluunniit singernernut aalaakkiissutinik aqqatinillu atuinissaq, Dronning Ingridip Napparsimmavissuani tarnimikkut nappaatilinnut immikkoortortaqarfimmi nakorsaannermit aalajangiivigineqassaaq. Nakorsaannerup peqannginnerani nakorsaq alla aalajangiisuusinnaavoq. Taamaattoqarnerata kingorna nakorsaannerup aalajangiineq piaarnerpaamik isummerfigissavaa.

Imm. 6. Nunap immikkoortuani napparsimmavinni peqqissaavinniluunniit nal. ak. aqqaneq marluk sinnerlugit sivisussusilinnik sivisussuseqassangatitaniluunniit pinngitsaaliissummik aalaakkiinermi aalaakkiinerup sivitsorneqarnissaa Dronning Ingridip Napparsimmavissuani tarnimikkut nappaatilinnut immikkoortortaqarfimmi nakorsaannermit aalajangiivigineqassaaq.

§ 19. Tassanngaannaq immikkorluinnaq ittumik pisoqartillugu napparsimasumut allanulluunniit isumannaallisaaneq eqqarsaatigalugu aalajangiinissap kinguartinnissaa illersorneqarsinnaanngippat, peqqissaanermi suliallit namminneq qiterusiillutik aalaakkiisinnaapput.

Imm. 2. Imm. 1 naapertorlugu iliuuseqarnissami peqqissaasoq akisussaasuusoq taassumunngaluunniit taartaasoq imaluunniit immikkut pisoqartillugu peqqissaasoq allaluunniit peqqissaaanermik suliaqartoq najuuttoq aalajangiisuusaaq.

Imm. 3. Qiterusiilluni aalaakkiinerup kingorna ingerlaannaq nakorsaq akisussaasuusoq aggersarneqassaaq, taassumalu pinngitsaaliissutit attatiinnartariaqarsinnaanera isummerfigissavaa.

§ 20. Napparsimasoq qiteruserlugu aalaakkigaq nakkutilliisoqassaaq.

Imm. 2. Peqqissaasoq, peqqissaanermik sulialik imaluunniit allamik naapertuuttumik ilinniagalik qiteruserlugillu aalaakkikkanik taamaallaat suliakkerneqartoq aalajangersimasumik nakkutilliisuutitaasinnaavoq.

Imm. 3. Napparsimasup kissaataa, ataqqinassusaa, imminullu naleqartinnera ataqqillugit nakkutilliisoqassaaq.

Imm. 4. Napparsimasumut tunngatillugu isumannaallisaanermut ajoqutaanngippat, nammineq inuttut inuuneqarnissamut pisinnaatitaaffeqassaaq.

§ 21. Pinngitsaaliissummik aalaakkiineq attatiinnarneqarpat, aalaakkiinissamik aalajangiinermiit pinngitsaaliissummik qiterusiinikkut aalaakkiinerup ingerlatiinnarneqarnissaa pillugu apeqqut, pissutsit apequtaatillugit akulikitsunik minnerpaamilli ullup unnuallu ingerlanerani ataasiarluni nakorsamit naliliivigineqartassaaq. Nakorsap naliliinera allattugaatinut ilanngunneqassaaq.

Imm. 2. Peqqissaanermik suliallit pinngitsaaliissummik aalaakkiineq pisariaaruppat sukkulluunniit taamaatissinnaavaat.

§ 22. Napparsimasut namminneq toqqissisimanissartik siunertaralugu aalaakkerneqarnissamik kissaateqarnerat tunngavigalugu aalaakkiineq nakorsamit akuerineqarnikkut aatsaat pisinnaavoq.

Imm. 2. Napparsimasut imm. 1 naapertorlugu aalaakkikkat immikkut nakkutilliisoqarnissamik neqeroorfigineqassapput.

Imm. 3. Qinnuteqaat aalaakkiisimanerlu Inatsisartut inatsisaanni § 30 naapertorlugu, napparsimasumut tunngatillugu allattugaatinut pinngitsaaliissummillu iliuuseqarnut nalunaarsuivimmut nalunaarneqassapput.

Nukersorfiginnineq

§ 23. Pinngitsaaliissummik aalaakkiinissamut piumasaqaatit eqquutsinneqarpata, napparsimasoq peqqinnissaqarfiup immikkoortuisa arlaanni uninngasoq uninngatinneqarsinnaavoq, pisariaqarpallu nukersorfigalugu sumiiffimmi immikkoortumut allamut nuutinneqarsinnaalluni.

Imm. 2. Pisuni ataasiakkaani suup atorneqarnissaa, Inatsisartut inatsisaanni § 4 naapertorlugu annikinnerpaamik iliuuseqarsinnaaneq eqqarsaatigalugu aalajangiivigineqassaaq, taamatutaaq nukersorfiginninnissap qanoq annertutiginera apeqqutaatillugu, piumasaqaatit sukannernerulersinneqassapput.

§ 24. § 23, imm. 1, naapertorlugu nukersornissamut piumasaqaateqanngikkaluarpalluunniit, Inatsisartut inatsisaanni kapitali 3 naapertorlugu nammineersinnaajunnaarsitat immikkoortortamiiginnarnissaat qulakkeerniarlugu pisariaqarpat nukersorfigineqarsinnaapput.

§ 25. Napparsimasup nappaatini pissutigalugu eqqissiveeqisup peqqinnerulernissaanut aalajangiisuuppat, pisariaqarpat nukersornikkut iliuusitut annikinnertut eqqissisaatitortinneqarnissaa nakorsap aalajangersinnaavaa.

Imm. 2. Eqqissisaatitortitsinermi nakorsaq peqataassaaq.

Kapitali 4

Napparsimasoq illersorniarlugu aalaakkiineq

§ 26. Illersuiniarluni aalaakkiineq imatut paasineqassaaq inuk imminut piaarinani annertuumik ajoqusersinnaaneranut illersorniarlugu arlaatigut pisarialimmik iliuuseqarneq.

§ 27. Napparsimasoq illersorniarlugu aalaakkiinissaq sioqqullugu, napparsimasumik takuniaareernermi nakorsaq tamatuminnga inassuteqaqqaassaaq.

Imm. 2. Nakorsap napparsimasumik illersuiniarluni aalaakkiinissamut inassuteqaataani, napparsimasumik illersuiniarluni aalaakkiutip suup qanoq annertutigisumik qanorlu pisoqarnerani atorneqarnissaa taaneqassaaq.

Imm. 3. Napparsimasumik illersuiniarluni aalaakkiinissanik inassuteqaataasunik aqutsinerit ataasiakkaat ingerlanneqarnissaat peqqissaanermik sulialinnut isumagitinneqarsinnaavoq.

§ 28. Napparsimasoq illersorniarlugu aalaakkiissutinut ilaapput qitequtit assigisaalluunniit napparsimasup siniffimmunit issiavimminilluunniit nakkarluni imaluunniit paatsiveerusimaarluni angalanermi ajoqusernissaa pinaveersaartinniarlugu qajassuartumik atorneqartartut.

Imm. 2. Illersuiniarnermi siunertamut suut tulluarnerunerannik napparsimasumullu suup iluarinarnerussaneraniq naliliineq tunngavigalugu suup illersuutitut atorneqarnissaa aalajangiivigineqassaaq.

Pinngitsoorani naliliisarneq

§ 29. Napparsimasumik illersuiniarluni aalaakkiinerup ingerlatiinneqarsinnaanerata nakorsamit naliliivigineqartarnera, pissutsit apeqqutaatillugit akulikitsunik minnerpaamilli iliuuseqarnissamik

aalajangiinerup kingorna ullut pingasut, qulit, 20-t, 30-llu qaangiunnerini tamatumalu kingorna inassuteqaatip atuutsinneqarnera tamaat minnerpaamik sap. ak. sisamat qaangiunnerini pisassaaq.

§ 30. Napparsimasumik illersuiniarluni aalaakkiincrup napparsimasumut isumannaatsuunera eqqarsaatigalugu, pisariaqartitsinermit annertunerusumik atorneqannginnissaa inassuteqaatillu tamatuma allanngortinneqarsinnaanerata, periarfissaqarnerit tamaasa apeqquuserneqartarnissaa, nakorsat peqqissaanermillu suliallit nakkutigisassaraat.

Kapitali 5

Immikkut nakkutilliineq immikkoortortamilu matunik parnaarsineq

Immikkut nakkutilliineq

§ 31. Napparsimasup imminut toqunnissaa imaluunniit arlaatigut nammineq allalluunniit peqqissusaannik annertuumik ajoquusiinnaanera imaluunniit napparsimasup uninngaqtaminik allanilluunniit malersuinissaa annertuumilluunniit ajoquusiinissaa pinaveersaartinniarlugit napparsimasup nammineq akuersissutigisimanngisaanik aatsaat immikkut nakkutilliisoqarsinnaavoq.

Imm. 2. Immikkut nakkutilliineq imatut paasineqassaaq sulisup ataatsip arlallilluunniit napparsimasumit nigoratik nakkutilliisinneqarnerat. Nigutsaaliorneq imatut paasineqassaaq napparsimasup uffarneq perusersarnerlu ilanngullugit nakkutigineqartuarnerani sulisut pinasuartumik iliuuseqarsinnaanerata.

Imm. 3. Napparsimasumik immikkut nakkutilliinissaaq nakorsap misissuereernermini aalajangiivigissavaa. Aalajangiineq allattugaatinut nalunaarneqassaaq.

Imm. 4. Immikkut nakkutilliineq ataannartumik nal. ak. 24-t sinnerlugit sivissuseqarpat, immikkut nakkutilliinissamik aalajangiineq Inatsisartut inatsisaanni § 42 naapertorlugu Tarnimikkut Nappaatillit Maalaarutaannik Aalajangiisartunut maalaarutigineqarsinnaavoq.

Immikkoortortami matunik parnaarsineq

§ 32. Immikkoortortami napparsimasut init uninngavii, napparsimasut kapitali 3 naapertorlugu nammineersinnaajunnaarsitat, napparsimasut Inatsisartut inatsisaanni § 23 naapertorlugu piaarinatik imminnut annertuumik ajoqusersinnaasut ilanngunnagit, matunik parnaarsisoqarsinnaavoq.

Imm. 2. Napparsimasup nammineq kissaatigippagu matunik parnaarsinissamik aamma aalajangiisoqarsinnaavoq, napparsimasulli imm. 1-imi aalajangersakkamut attuumassuteqanngitsut inaannut matut parnaarneqassanngillat. Napparsimasup piumasarippagu matu ingerlaannaq parnaarussaarneqassaaq.

Imm. 3. Immikkoortortami matunik parnaarsinissaaq nakorsamit aalajangiivigineqassaaq.

Imm. 4. Napparsimasut imm. 1-imi aalajangersagaq naapertorlugu immikkoortortami matunik parnaarsinissamik aalajangiinermut attuumassuteqanngitsut, immikkoortortami sulisunut saaffiginnikkut sapinngisaq tamaat kissaataappallu immikkoortortamit anisinnaanermik ingerlaannaq neqeroorfineqassapput.

Imm. 5. Matunik parnaarsinissaaq aalajangiunneqariarpat imm. 4-mi aalajangersagaq naapertorlugu immikkoortortamit aninissamut periarfissaaq ilanngullugu, immikkoortortami napparsimasut tamarmik kalerrinneqassapput.

Imm. 6. Immikkoortortamut unitsitaanermut atatillugu immikkoortortap aaqqissornera immikkoortortamilu minnerusunik immikkoortortaqrpat taakku matuisa parnaarneqarsinnaanerata ilanngullugu, napparsimasooq ilisimatinneqassaaq.

Kapitali 6

Pinngitsaaliissummik timikkut eqqiluisaartitsineq

§ 33. Tarnimigut nappaatilik nappaanni pissutigalugu timikkut eqqiluisaarnissaminik isumaginnissinnaanngitsoq, napparsimasoq nammineq, uninngaqaataasut sulisulluunniit eqqarsaatigalugit pisariaqarpat, pinngitsaaliissummik eqqiluisaartinneqarsinnaavoq.

Imm. 2. Napparsimasup pinngitsaaliissummik timimigut eqqiluisaartinneqarnissaa Dronning Ingridip Napparsimmavissuani tarnimikkut nappaatilinnut immikkoortortaarfimmi nakorsaanermit, napparsimasup massakorpiaq eqqiluisaarnikkut qanoq inneranik misissuineq naliliinerlu tunngavigalugit, aalajangiivigineqassaaq. Nakorsaanerup aalajangiinera tamatumunngalu tunngavilersuutaa napparsimasoq pillugu allattugaatinut nalunaarneqassapput.

Imm. 3. Pinngitsaaliissummik eqqiluisaartitsineq assersuutigalugu tassaasinnaavoq uffarneq, qulinneq, kigutigissarneq, assersuutigalugu puiguttortuni nangernik nalequttanillu taarsiineq il.il.

Imm. 4. Pinngitsaaliissummik eqqiluisaartitsineq, inatsimmi § 4-mi annikinnerpaaffimmiititsinissamik tunngaveqarnissamut aalajangersagaq naapertorlugu, sapinngisaq tamaat napparsimasumut pisariaqanngitsumik kanngutsatsitsinngitsumik ajoqusiinngitsumillu qajassuartumik isumagineqassaaq.


Imm. 5. Pinngitsaaliissummik eqqiluisaartitsinerit pillugit maalaarutit napparsimmavimmi oqartussanut saaffiginnissutaassapput.

Kapitali 7

Atuutilersitsineq

§ 34. Nalunaarut atuutilersinneqarpoq 16. december 2013.

Namminersorlutik Oqartussat, ulloq 2. december 2013


Steen Lynge


Ann Birke Kjellden